

Obukhoonyi Oburulanga Ikulu

ESHIAANZWA NENDE WATSON GOODMAN

SHINO SHIRAKUSIBWA TAWE

"OBUKHOONYI OBURULANGA IKULU" nobwanzwi bwebiasia bilala bieIbibulia ebirula mubitabo biayo ebiahukhaane. Isie esuubilanga mbu obwinoosi bweshisina shiamakhuwa keIbibulia obuli obulavi muno

burulanga mumakhuwa keIbibulia akeene. Likhuwa liaNyasaye lirulanga mwikulu, ne lilimwo obukhoonyi obunji khubandu abali neinzala nabaliibwa obuloho bwobulunjishi. Omundu niyeekalukhasia, nalekha ebionoono, niyeenjisia Omwami Yesu Kristo amenyenje mumwoyokwe, nasuubila nomwoyo kwosi mbu Yesu Kristo niye Omuhoniawe, Omwami Yesu omwene alamumanyishila nokhumuheelesia obusangaali nomulembe. Ndabirila mukeenekano omuyika kwa 1937; ne okhurula olwenolwo eshili okhufunakakhwo obuhambani obuli hakari wOmwami ninasi ta. Ekhuhombelesia mbu omufuchiilile Yesu bulaano buno abe Omuhoniawo, khandi Omwamiwo, nikaba mbu oshili okhukholakhwo orio ta.

-Watson Goodman (1920-2002)

OBUHEELI BWANYASAYE

AbaRoma 5:8

Ne Nyasaye yalolosia obuheeli bubwe khwifwe mwikhuwa lino, mbu olwa khwali nikhushili aboonooni, Kristo yakhufwila.

Yohana 13:1

Ne lisabo liaPasaka olwa liali nilishili, Yesu olwa yali namanyile mbu eshiseshie shimalile okhuula olwa yakheenyokha narula mushialo shino natsia ewaSamwana, khandi olwa yali naheelile abebe abali mushialo, yabaheelela elala.

Obufwimbuli 1:5

Nokhurula khuYesu Kristo, omurumbusi wobuloli omusuubilwa oyo, oweebulwa owambeli okhurula mubafu, nomukhulundu wabaruchi beshialo. Oluyali nende obunyali bibe khu oyo owakhuheela, nakhuboholola mubionoono bieefwe khulwa amabangake.

Yeremia 31:3

OMWAMI yamuloleshela okhurula ehale, ari Ndakhuheela obuheeli oburahwaho ta; niko akachila ndatsitsachisia obuheeli bwanje oburalilu khwiwe.

Yohana 3:16

Okhuba Nyasaye yaheela muno eshialo, okhuula khukhuhaana Omwanawe omuteelwa, mbu omundu yesi oumusuubilila aleshe okhutiba, ne mbu abe nobulamu bwobumeli.

1 Timotseo 3:16

Okhuba bosi bafuchilisania mbu libiso lieidini yeefwe nelikhongo; mbu Yamanyishila mumubili, obulunjishibwe bwalolosilibwa muroho, valolwa nende abamalaika: yeelwatswa mumahanga, yasuubililwa mushibala, yakulusibwa muluvali.

Yohana 14:7-10

Nimwakha'manvile. khane mwakhamumanyile nende Papa vesi; nokhurula olwa leelo mumumanvile, khandi mumuluutsi. Filipo namusunjila ari Omwami, okhumanyiekhwo So watsana; ako kakhakhuhela. Nave Yesu namusuniila mbu Khane ndabeelenje nineenywe eshise eshirambi shiri nanwa, nawe noshili okhu-'manya, Filipo? Ounduutsi isie amuluutsi Papa; kho oboola orie, mbu Okhumanyie Papa? Shiosuubilanga shinga olwa endi muPapa, khandi Papa shinga olwa ali mwisie, ta?

Matsayo 1:22, 23

Ne kano kosi keekholile mbu mana amakhuwa koosibwe aka Omwami yasunjila mumulakusi, ari Lola, omukhaana omushisila alihela inda, niveebula omwana omusiani, ne balimukulikha eliira mbu Imanueli, eshisina mbu. Nyasaye halala nineefwe.

YESU. OMWANA WANYASAYE

1 Yohana 4:15

Omundu yesi owiyama shinga Yesu olwa ali Omwana waNyasaye, Nyasaye amenyanga muye, naye muNyasaye.

AbaKolosai 2:9

Okhuba muye nimwo omwa obulamba bwosi bwObunyasaye bumenyanga eshinamubili.

Matsayo 17:5

Ne olwa yali nashiboolanga, lola, lileesi ling'inang'inu liabafwimba; ne lola, omwoyo okwarula mwileesi nikuboola, kuri Uno niye Omwana wanje omuheelwa; muye nimwo omwa enjamisilibungwa muno; mumuhulilenje.

Isava 9:6

Khulweefwe omwana yeebuulwe, khuheelwe omwana omusiani; oburuchi nabwo bulabeetsanga khwibekalie, naye alakulikhwa eliira, mbu Omwibaali Wamakana, Nyasaye Wobunyali, Seefwe Wobumeli, Omukhulundu Womulembe.

Luka 1:35

Naye malaika nakalusia, namusunjila mbu Roho Omutakatifu alakhwitsila, obunyali bwa Oyo Ouli Ikulu Muno nabwo bulakhufwimba; niko akachila eshieneshio eshiitsa okhwibulwa shilalangwa mbu eshitakatifu, mbu Omwana waNyasaye.

Yohana 11:25

Yesu namusunjila ari Isie nisie obulamushi, khandi nende obulamu; ousuubilila isie, kata olwa afwa, ne alaba omulamu.

Yohana 13:13

Inywe munanga mbu Omwechesia, khandi mbu Omwami; ne muboolanga bulayi; shichila nilwo olwa endi.

Yohana 8:23

Naye nababoolela mbu Inywe muli abahasi; isie endi oweikulu. Inywe muli abeshialo shino; isie shindi oweshialo shino tawe.

Yohana 9:5

Olwa endi mushialo, isie nisie obulafu bweshialo.

Yohana 4:25, 26

Omukhasi namusunjila ari Emanyile mbu Masihi ali okhwitsa, oulangwa mbu Kristo; naye olwa alaba niyeetsile, alakhufwimbulila amakhuwa kosi. Yesu namuboolela mbu Isie ouboolana ninawe, ISIE NISIE.

Yohana 8:58

Yesu nababoolela ari Toto mwene, emusunjila mbu Olwa Aburahamu yali nashili okhubaho, ISIE NISIE.

Yohana 10:7

Kho Yesu nababoolela khandi, ari Toto mwene, emusunjila mbu isie nisie eshilibwa shiamakondi.

AKAMAKANA KANDI AKA YESU YAKHOLA

Matsavo 14:19-21

Nalaka ahemikanda okhwikhala hasi khubunyasi; nabukula emikaate echio chiraano netsinyeeni tsibili, nahenga mwikulu nabisabila ibaraka, nabisonyola, nakabila abeechibe emikaate, abeechi nabo nibakabila abemikanda. Bosi nibalia nibeekura; nibakhung'aasia ebisonye ebiali nibitong'ile nibeetsusia ebimwelo ekhumi nabihili. Abalia bali abasaatsa shinga ebikhumila biraano, oburabala abakhasi kata abaana tawe.

Luka 5:4-6

Ne olwa yali naleshile okhuboola, yamubiila Simoni ari Sitia khutsie halusiba, mufuube tsikhanda tsieenywe, mbu mwikalile tsinyeeni. Simoni nakalusia, nasunga mbu Omwami, khunyakhaane eshilo tulu, nikhuratiila eshindu ta; ne khulwa likhuwalio ndaleesia tsikhanda, Ne olwa bali nibakholile bario, beekalila tsinyeeni tsinyinji muno; tsikhanda tsiabwe nitsienya okhukhalikha.

Matsayo 21:19

Nalola omukhuyu khundulo weinjila, natsia ewa kwali, naranyoolakhwo eshindu ta, habula amasaafu konyene; nakuboolela ari Ebiamo bileshe okhurula olwa leelo kata inziayo ta. Habwene nahabwene omukhuyu nikuniala.

6 YESU KRISTO NIYE OMULONJI NENDE OMWAMI

AbaKolosai 1:16

Okhuba mumwenoyo nimwo omwa ebindu biosi bialonjelwa, mwikulu khandi mushialo, ebindu ebirolekha nende ebindu ebiralolekha ta; kata nibili ebifumbi biowami, kata abobwami, kata aboburuchi, kata abobunyali; ebindu biosi bialongwa khululwe, nibichooma khuye.

Aba Heburania 1:2

Nyasaye. . . Ne mubumaliilishi bweshise shino wakhusunjila mu-Mwanawe, owa yakhola omwene bindu biosi; khandi mumwenoyo nimwo omwa yalonjelamwo eshibala shiosi.

AbaRoma 14:9

Okhuba niko akachila Kristo yafwa nende okhulamukha, mbu abe Omwami wabafu nende abali mwoyo bosi.

1 AbaKorinzo 1:9

Nyasaye nomwisiikwa, owamulanga okhwinjila mubusanjilani bwomwanawe Yesu Kristo Omwami weefwe.

Ebikhole 2:36

Kho abeinzu yosi yaIsiraeli bamanye toto mbu Nyasaye yamukholile Yesu uno, owa mwabamba khumusalaba, abe Omwami, khandi Kristo.

YESU KRISTO NIYE OMUYAASI WABOSI

Matsayo 25:32

Abamahanga kosi nabo balikhung'aasibwa imbeliwe; naye alibaahukhasia, shinga omwayi olwa yaahukhasinjia amakondi nende tsimbusi.

AbaRoma 14:10

Ne iwe, omukhalachilanga omwana weenywe eshiina mbushiina? Kata khandi iwe, olekanga omwana weenywe mbushiina? Okhuba fwesi khulisinjila hashifumbi-shiobuyaasi shiaNyasaye.

Ebikhole 10:42

Ne yakhulachilisia okhwilwatsila abandu nende okhurumbula akobuloli shinga uno olwa ali ye owareebwaho nende Nyasaye abe omukhalachi weshiina khubalamu khandi nende abafu.

AbaRoma 2:16

Kaliba kario khunyanga eyo olwa Nyasaye aliyaasia tsiyemi tsiabandu tsiamabiswi, injiili yanje shinga olwa yiboola, muYesu Kristo.

2 Timotseo 4:1

Ekhulaka imbeli waNyasaye nende waKristo Yesu ouliyaasia abalamu nende abafu, khandi khulwa okhulolekhakhwe nende obwamibwe.

8 OBUNUNULWI BURULA KHUYESU YENYENE

Yohana 8:24

Niko akachilile nimusunjiile mbu mulafwila mubionoono bieenywe; shichila nimurasuubila mbu ISIE NISIE ta, mulafwila mubionoono bieenywe.

Ebikhole 4:12

Ne obuhonia shibuli muwundi yesi ta; kata libulaho eliira lindi hasi welikulu elia abandu baheebwa, elia khukhoyile okhuhonilibwamwo.

Yohana 10:9

Isie nisie eshilibwa; omundu yesi naba niyeenjila nabirila khwisie, alahona; mana aleenjilanga nende okhurula, nanyoola obwayilo.

AbaHeburania 5:9

Mana namalile okhukholwa omulamba ario, yabakwila bosi abamuhulilanga eshinoko shiobuhonia bwobumeli.

AbaHeburania 7:25

Khandi niko akachilanga nanyala okhubahonilia elala abo abasitanga ahambi khuNyasaye khululwe; okhuba abeetsangaho mwoyo obushia nobushia okhubasaayila.

Yohana 14:6

Yesu namuboolela mbu Isie nisie injila, khandi obwatoto, khandi obulamu. Abulaho owitsila Papa narabirila khwisie ta.

OBUNUNULWI BURULA KHUYESU YENYENE

AbaKolosai 1:12-14

Mumukhupile Seefwe orio, owakhunyalila okhuba abakwanile okhusanjilana khubulaame bwabatakatifu mubulafu. Yakhuhonia mubwami bweshiilima, nakhuhuyia nakhuleera mubwami bwOmwanawe omuheelwa; ne muye khunyoolela obununulwi bweefwe, nibwo obuleshelwi bwebionoono bieefwe.

1 AbaKorinzo 1:30

Ne niye ouchila nimuli mu-Kristo Yesu, owakholwa obuchesi bwaNyasaye khwifwe, khandi nende obulunjishi, nobwahuli, nobununuli.

Tito 2:14

Ye yeehaana khulweefwe, mbu akhununule mubumayaanu bwosi, niyeesiiyila omwene oluyia lwabandu olwakhaba olulwe omwene, abarakhwo omwoyo khubikhole ebilayi.

Obufwimbuli 5:9

Nibeemba olwimbo oluyia, bari Niwe oukwanile okhubukula eshitabu, nokhufunaka ebibalikho biashio; shichila weerwa, khandi khulwa amabangako wamukulila Nyasaye abombuli luyia, nabuli lulimi, nabuli bandu, nabuli lihanga.

10 AMABANGA KAKRISTO NIKO AKAKHUNUNULA

Matsayo 26:28

Okhuba kano namabanga kanje akeIndakano, akeebeenela abandu abanji khulwa okuleshelwa khwebionoono.

AbaRoma 5:9

Kho bulaano, olwa khumalile okhubasilibwa obulunjishi khulwa amabangake, shikhulashila muno okhuhonibwa muburima khululwe?

AbaEfeso 1:7

Ne mumwenoyo khuli nobununulwi khulwa amabangake, mbwobuno mbu obuleshelwi bwebionoono bieefwe, obuyinda bwobukoosiabwe shinga olwa buli.

1 Yohana 1:7

Ne nikhuba nikhuchenda mubulafu, shinga ye olwa ali mubulafu, kho khuba nikhusanjilananga abeene nabeene, amabanga kaYesu Omwanawe nako kakhusiiyanga khubwonooni bwosi.

1 Petero 1:18, 19

Mumanyile bulayi mbu ebia mwanunulilwa, okhurula mubwiyili bweenywe obukhaya obwa mwakaamilwa nabakuuka, shibiali ebindu ebibolanga, shinga ifeetsa kata itsahaabu, tawe; nebutswa kali amatsayi akolukoosi muno, shinga akelikondi elibula eshikha kata eshiroonyelesi shiosi, niko akaKristo.

OKHUHONIBWA KHULWA OKHUSUUBILILA KRISTO

1 Yohana 5:4

Shichila eshiibulwa nende Nyasaye shihulanga eshialo; ne buno nibwo obuhuli obwahula eshialo, mbu obusuubili bweefwe.

AbaEfeso 2:8, 9

Okhuba mwahonibwa khulwa obukoosia, munjila yobusuubili; shimuli inywe abakhola ta; neshihaanwa shiaNyasaye; shikhuli okhwebikhole ta, mbu omundu yesi aleshe okhwiyitsiala.

AbaRoma 5:1

Khulwako, olwa khubasilibwa obulunjishi khurio khulwa obusuubili, khuli nomulembe khuNyasaye khulwa Omwami weefwe Yesu Kristo.

Yohana 6:28, 29

Kho nibamureeba bari Khukhole khurie, kho khukhole emilimo chiaNyasaye? Yesu nakalusia nabasunjila ari Kuno nikwo omulimo kwaNyasaye, mbu mumusuubilile oyo owa yaruma.

Yohana 20:31

Ne bino bihandiichilwe mbu musuubile shinga Yesu olwa ali ye Kristo watsana, Omwana wa-Nyasaye; khandi mbu nimusuubiile, mube nobulamu khulwa eliiralie.

Itsabuli 103:11

Okhuba shinga likulu olwa lieehaanya ikulu weshialo muno, nolwa obuheelibwe oburalilu buli obunii burio khubamuriitsanga.

Itsabuli 103:17

Ne obuheeli oburalilu hwO-MWAMI bubeetsangaho okhurula khubumeli okhuula khubumeli. khubamuriitsanga, nobuluniishibwe khubeetsukhulu babwe.

Mika 7:18

Kuli heena omunyasaye okwinga iwe, ouleshelanga abandu obumayaanu, nomaayia obukhayi bwomusikalo kwobulaamebwo? Shiobiikhanga oburimabwo inziayo ta, okhuba osangaalilanga obuheeli oburalilu.

Tito 3:5

Yakhuhonia; ne shikhwali khulwa ebikhole biobuluniishi ebia ifwe khwakhola ta, habula tsimbabasitsie shinga olwa tsili, muniila vokhwosibwa khwobwibulwi obuvia, nokhukholwa abavia nende Roho Omutakatifu.

Tsinzikhuulu 3:22, 23

Obuheeli oburalilu bwOmwami shibuhweetsanga kata eshisashie okhwakama ta. Bibeetsanga ebiyia mutsuli buli mutsuli; obwisiikwabwo nobukhongo muno.

Yohana 7:37

Haho khunyanga eyaheelelesia, niyo inyanga ikhongo yelisabo, Yesu yasinjila nalajinsia, ari Omundu yesi owa obuloho bulia, yeetse khwisie anywe.

Obufwimbuli 22:17

Roho nende omweha baboola mbu Witse! Ouhulila yesi aboole mbu Witse! Oyo owa obuloho bulia, yeetse; omundu yesi oukeenya abukule khumatsi kobulamu akahaanwa butswa.

Isaya 1:18

OMWAMI aboola koo: Bulaano mwitse khukhalache amakhuwa; kata ebionoono bieenywe nibili shinga iranji iranzayi, bilalaba shinga itsaluchi; kata nibiakhanya shinga ipala, bilaba shinga obwoya bwamakondi amalafu.

13

Isaya 55:1

Bayaye, inywe mwesi aba obuloho bulia, mwitse amatsi; kata abula amapeesa, mwitse, mukule, nimulia; Tooto, mwitse, mukule idivai nende amabeele harali amapeesa naharali obukusi tawe.

Matsayo 11:28

Mwitse khwisie, inywe mwesi abachoonyanga nimu sitohelwa, nasi ndalamuhuluusia.

14 ABANDU BOSI SHIBALI ABAANA BANYASAYE TA

1 Yohana 3:10

Mwikhuwa lino nimwo omwa abaana baNyasaye bamanyishilanga, khandi nende abaana baSetani; mbu ourakholanga akobulunjishi shiali owaNyasaye tawe, kata oyo ouraheelanga omwana wabwe ta yesi ario.

AbaRoma 8:14, 15

Okhuba bosi abeemililwa nende Roho waNyasaye, abo nibo abaana baNyasaye. Shichila shimwaheebwa roho yobubohe obumukalusia muburii ta, ne mwaheebwa roho yokhukholwa abaana, eyichilanga nikhulanjisia khuri Aba, Papa.

AbaFilipi 2:15

Mbu mubule eshiuku shiosi nimuba abeshiilongoole, abaana ba-Nyasaye ababula imbala yosi mukari wabolwibulo olushiamu olurambaatsanu, omwa muloleshelangamwo shinga ebiashilo mushialo.

2 AbaKorinzo 6:17, 18

Niko akachila Omwami nasunga mbu Murule hakari wabwe, nimwiyahula, nimuratiilak hwo khushindu shiosi shiomusilo ta; nasi ndalamwinjisia, ne ndalaba khwinywe Seenywe, neenyu mulaba khwisie abaana banje abasiani nende abakhaana. Nilwo olwa Omwami Ounyala-biosi aboola.

Isava 5:11

Woowe khubeenabo abahuunanga mumabwibwi mbu balondachilile obunywi; abatsiilililanga okhuula mushilo hakari, okhuula olwa idivai yibaashia shinga omulilo. obumeesi, obulangu, nende akafwana kario; akeenako eranjiila okhumuboolela khale, shinga olwa ndamuboolela khale olwambeli, mbu abakholanga akafwana kario shibalilia obulaame bwobwami bwaNyasaye ta.

AbaGalatia 5:19-21

Ne ebikhole biomubili biibakalanga ebulafu; biene mbiebino, mbu obuheyi, akeshifwabwi, obwilaasi, obwinamili bwebifwanani biabutswa, obufila, obusuku, obusoolo, okhukhalikha omukongo, oburima, obuyingani, obukabukhani. emiahukho. imbalikha.

AbaRoma 13:13, 14

Khwiyilenje mubwatoto, shinga abomushiteere; khuleshe obulangu nobumeesi; khuleshe obusoolo nende okhukhalikha omukongo. Nebutswa mwifwale Omwami Yesu Kristo nimurakasilia omubili obwiyangu bwokhukhola obwikombi bwakwo obubii ta.

OBUCHOOMI OBULAYI BWONYENE SHIBUHELILE TA

Mariko 10:17-22

Olwa vali nali khunjila natsiitsanga, omundu undi yamutsiila tsimbilo namusikamila, namureeba ari Omwechesia omulayi, nekhole endie mbu mana enaamilwe obulamu bwobumeli? Yesu namukalusia ari Kho unanga mbu omulayi mbushiina? abulaho ouli omulayi habula mulala, niye Nyasave. Omanvile amalako, mbu Oreera ta, Oraheya ta, Oreeba ta, Orachiikha ta, Orakaatia ta, Heelesia so nende mawo oluvali. Naye namusunjila mbu Omwechesia. ako kosi engakholanga okhurula nindi omwana. Haho Yesu yamuhenga namuheela, namusunjila ari Oleemile likhuwa elala; mbu tsia okusie ebia oli ninabio biosi, oheelesie abamanani, mana olaba nelibiikho mwikulu; mana witse, unondekhwo. Khwikhuwa elo yakhuunia mumoni, niyeenyokha nabeeleele; shichila yali omwene mikunda emikali.

Matsayo 22:37, 38

Naye namuboolela mbu Omuheelenje Omwami Nyasayewo nende omwoyokwo kwosi, neshiimoshio shiosi, nobuyililisiibwo bwosi. Lino nilio lilako likhongo khandi neliambeli.

Yakobo 1:22

Mubeetsenje abakholi belikhuwa, ne muraba abahulili butswa ta, abeekaatia abeene.

1 AbaKorinzo 6:9, 10

Kata shimumanyile mbu ababula obulunjishi shibalilaamilwa obwami bwaNyasaye ta? Mureekaatia ta; mbu abasooti shibalilaamilwa obwami bwaNyasaye ta, kata abeenamila ebifwanani, kata abaheyi, kata abeelaasi, kata abatanyana, kata abeebi, kata abalangukhu, kata abameesi, kata abanyechi, kata abanuuli tawe.

AbaEfeso 5:6

Omundu yesi aramukaatia namakhuwa amakhaya ta; okhuba amakhuwa kano niko akachilanga oburima bwaNyasaye nibwitsa khubobukhayi.

1 Yohana 3:7, 8

Baana batii inywe, mwirecheshe omundu yesi aleshe okhumushiamia. Oukholanga akobulunjishi niye omulunjishi, shinga ye olwa ali omulunjishi. Oukholanga akobwonooni nowaSetani; okhuba Setani yoonoonanga okhurula khukhuchaaka...

AbaGalatia 6:3

Shichila omundu naba niyeepaara shinga olwa ali eshindu, ne narali eshindu ta, yeekaatia omwene butswa.

AbaRoma 5:12

Niko akachila, shinga obwonooni olwa bweenjila mushialo khulwa omundu mulala, nende okhufwa khulwa obwonooni; nindio okhufwa khwatswanila abandu bosi, okhuba bosi boonoona.

Yakobo 1:15

Mana obwikombi olwa buba nibubeleeshe bumalanga bwibule eshionoono; eshionoono nashio. olwa shiba nishikhulile, shiibula okhufwa.

AbaRoma 8:6

Okhuba eshia omubili kuchoominjiakhwo amapaaro nokhufwa; ne eshia roho yichoominjiakhwo amapaaro nobulamu nende omulembe.

Ezekieli 18:20

Omwoyo okwonoonanga, okwene kulafwa; omwana shialakuumilwa obumayaanu bwasamwana. kata samwana okhukuumilwa obumayaanu bwomwanawe ta; obulunjishi bwomulunjishi bulaba khuye, nabwo obubii bwomubii bulaba khuve.

Luka 15:32

Ne kakhoyeele okhutsatsahala nokhusangaala; okhuba uno omwana weenywe vali nafwile, ne ulamuushe; yali niyakora, unyooleeshe.

1 AbaKorinzo 15:3, 4

Okhuba olwambeli ndamukaamila akeenako aka ndaheebwa, aka Kristo shinga olwa yafwa khulwa ebionoono bieefwe, shinga amahandiiko olwa kaboola; khandi shinga olwa yayabilwa; khandi shinga olwa yalamusibwa mukhufwa khunyanga yakhataru, shinga amahandiiko olwa kaboola.

Yohana 11:43, 44

Ne olwa yali naboolile ario, yalanga nende omwoyo omukhongo, ari Lazaro, rulamwo. Omufu oyo narula, naboyilwe amakhono nebilenje nende isanda eyeing'ani, naboyilwe eshitambaya mumoni. Yesu nababiila ari Mumuboholole, atsie.

Obufwimbuli 1:18

Noubeetsangaho mwoyo; ndali omufu, ne lola, endi mwoyo ebisoni nebisoni, nendi nende ebibohololo bioluumbe nende biemakombe.

Yohana 10:17, 18

Kano niko akachila Papa yaheelanga, mbu ehaana obulamu bwanje, mbu mana embubukule khandi. Abulaho oumbuyiniakhwo, nebutswa omwene embuhaana. Endi nobunyali okhubuhaana, nendi nobunyali okhububukula khandi. Lilako lino ndalakwa nende Papa. Okhukalushila Mumalako 5:7-21 Orabeetsanga nende nyasaye undi ta, habula isie sienyene.

Oreekholela eshifwanani eshibaatse ta, obukondo bweshindu shiosi eshili mwikulu hekulu, kata eshili mushialo hasi, kata eshili mumatsi hasi weshialo; orabiinamilanga kata okhubikhalabanila ta...

Orarumbulanga butswa eliira liOMWAMI Nyasayewo ta; shichila OMWAMI shialachweya okhumurakhwo eshiina tawe ourumbula butswa eliiralie.

Yitsulilanga inyanga yeisabaato, okhuchiahulanga, shinga OMWA-MI Nyasayewo olwa yakhulaka. Tsindaalo tsisasaba okhalabanenje nokhola emilimochio chiosi; ne inyanga yomusaafu niyo isabaato yOMWAMI Nyasayewo. . .

Heelesinjia so nende mawo oluyali, shinga OMWAMI Nyasayewo olwa yakhulaka. . .

Oreera omundu ta. Kata oraheeya ta. Kata oreeba ta. Kata orachiikha owashio ta.

Kata orakhaayilwa omukhasi wowashio ta; kata oreekomba inzu yowashio, kata omukundakwe, kata omukholiwe oweshisaasa kata omukholiwe oweshikhasi, ing'ombeye kata isishiliye, kata eshindu shiosi eshia owashio ali ninashio ta.

SHIONYALA OKHWIBISILA NYASAYE TA

AbaHeburania 4:13

Kata shibulaho eshilonje shiosi eshilibiswa: nebutswa biosi bili eshihechenye nibibakalwa ebulafu imbeli wetsimoni tsia oyo ouli omusiniilili wamakhuwa keefwe.

Tsinielo 15:3

Tsimoni tsiOMWAMI tsibeetsangaho buli habundu hosi, nitsihenganga amabii nende amalayi.

Luka 8:17 Shichila libulaho elibiswa elirabisukha ta, kata elifuunikhwa elirafuunukha lialolekha muhulafu tawe.

Itsabuli 139:8 nende 12

Nimba ningulukha ninzia mwikulu, oba noliyo; nimba ninzala obulili bwanie eMakombe, oba noliyo. . . khane kata eshiilima shishiba eshiilima khwiwe ta: ne eshilo shiakha shinga eshiteere; eshiilima nobulafu bifwanana butswa.

Ayubu 34:21, 22

Okhuba tsimonitsie tsihenga tsiniila tsiomundu: alolanga iniendave vosi. Bubulaho obumali, kata eshiilima ti ewa abakholi bobumayaanu beebisa ta.

Yeremia 23:24

Aliho ounvala okhwibisa hamabiswi mbu endeshe okhumulola? nolwa OMWAMI areeba. Shinzitsulanga mwikulu nomushialo pe? nolwa OMWAMI areeba.

22 OBUKUUMWI BWOBUMELI OBWABAMAYAANU

2 Petero 3:7

Nebutswa likulu eliliho bulaano, kata nende eshialo, biabiishilwa omulilo khulwa likhuwa tsana, nibilindiilila induukho yobuyaasii nobuhesibwi bwabandu abaramuria Nyasaye ta.

Itsabuli 9:17

Ababii balahunzukha batsie eMakombe, nibo abamahanga akeebilila Nyasaye.

Matsavo 18:8

Ne omukhonokwo kata eshilenjeshio nishiba nishikhwisichirasinjia, oshireme oshisukune ehale; neshilayi winjile mubulamu noli omulema kata oweindieku, okhushila okhusukunwa mumulilo kwobumeli noli nemikhono chibili kata ebilenje bibili.

Matsayo 13:41, 42

Omwana wOmundu aliruma abamalaikabe, nabo balikhung'aasia ebiisichirasio biosi, nende abo abakholanga obumayaanu, nibabirusia mubwamibwe, nibabisukuna mumulilo okufwana shinga okwelirumbi; ebweneyo khulibayo okhulila nokhulumaasia ameeno.

Matsayo 25:46

Bano balarula batsie mukhukuumwa khwobumeli; ne abalunjishi mubulamu bwobumeli.

OBUYAASIBWI BULI IMBELI

AbaHeburania 9:27

Ne shinga olwa kalakwa mbu abandu bafwe lulala, mana olunyumakhwo obuyaasibwi nibubaho.

Ebikhole 17:31

Shichila amalile okhuraho induukho olwa alayaasia eshialo eshiina shiobulunjishi, khulwa omundu oyo owa yaahula; khandi yasuubisiye abandu bosi amakhuwa ako, olwa yamulamusia mukhufwa.

1 Yohana 4:17

Mwikhuwa lino nimwo omwa obuheeli bukholelwamwo obulamba mwifwe, mbu khube abeikholo nyumu khunyanga yeshiina, shichila shinga ye olwa ali, nindio ifwe khuli mushialo shino.

2 AbaKorinzo 5:10

Okhuba fwesi khukhoyile okhumanyikha imbeli weshifumbishiobuyaasii shiaKristo; mbu buli mundu akalusilibwe ako aka yakhola nali mumubuli, aka yakhola shinga olwa kali, kata amalayi kata amabii.

2 Petero 2:9

Omwami yamanya okhuhonia abo abariitsanga Nyasaye mukhuteemwa, nokhubabiikha ababula obulunjishi mubukuumwi okhuula khunduukho yeshiina.

AbaRoma 5:15

Ne eshihaanwa eshia khuheebwa buha eshio shishili shinga obukhayi olwa bwali, tawe. Okhuba abandu abanji nibaba nibafwa khulwa obukhayi bwamulala, okhushila muno obukoosia bwa-Nyasaye, nende eshihaanwa eshiarula mubukoosia bwomundu mulala oyo Yesu Kristo, biashilaanila muno abandu abanji.

2 AbaKorinzo 8:9

Okhuba mwamanya obukoosia bwOmwami weefwe Yesu Kristo; mbu kata olwa yali omwene buyinda, ne khulweenywe yakwa omumanani. mbu mana inywe muyindihale khulwa obumananibwe.

Ebikhole 4:33

Nabo abarume barumbula obuloli bwabwe khubulamushi bwOmwami Yesu namaani; obukoosia nibuba khubo bosi muno.

AbaRoma 9:16

Kho shikali aka oyo owenya, kata aka oyo ounyakhana ta, habula akaNyasaye oubeelanga tsimbabasi.

1 Petero 5:5

. . . okhuba Nyasaye afukulanga abeechinjimisii ne abakoosinjia abeetuutuyii obukoosia.

OKHWIKALUKHASIA

Ebikhole 3:19

Kho mwikalukhasie, nimushiukhana, mbu ebionoono bieenywe bisiliisibwe, mbu mana tsinduukho tsiobusakulushi tsiitse khulwa okhubaho khwOmwami,

Ebikhole 17:30

Ne ebise ebiokhukorwa, Nyasaye yabimaayia; habula bulaano alachilisinjia abandu mbu bosi, ababuli handu, bakhoyile okhwikalukhasia.

Luka 13:3

Emukaania mbu tawe; ne nimureekalukhasia ta, mwesi mulasikha muri nanwa.

Ebikhole 2:38

Petero nabasunjila ari Mwikalukhasie nimubatisibwa, buli mulala, muliira liaYesu Kristo, mbu munyoole obuleshelwi bwebionoono bieenywe; mana mulanyoola eshihaanwa shiaRoho Omutakatifu.

Matsayo 3:2

Mwikalukhasie; okhuba obwami obwomwikulu busitile ahambi.

2 AbaKorinzo 7:10

Okhuba eshibeela eshia Nyasaye achama shileera obwikalukhasii obuchooma khubuhonia, niburaleera obwisirali ta; ne eshibeela shieshialo shileera okhufwa.

Mariko 2:5

Yesu, olwa yalola obusuubili bwabwe, yasunjila owelikara ari Mwana wanje, wakhamala okhuleshelwa ebionoonobio.

Isaya 55:7

Omumayaanu aleshe injilaye, noyo oubula obulunjishi aleshe amapaaroke; amukalushile O-MWAMI, naye alamubeela tsimbabasi; khandi khuNyasaye weefwe, okhuba alamuleshela elala.

Ezekieli 18:21

Ne omubii naba nashiukhana narula khubionoonobie biosi ebia yakholanga, nalinda amalako kanje kosi, nakhola akafuchiililwa, akali habwene, okhuba mwoyo alaba mwoyo; shialafwa ta.

Ebikhole 5:31

Omwenoyo, Nyasaye yamwemeshela hamukhonokwe musaatsa abe Omukhulundu khandi Omuhonia, khulwa okhuheelesia Isiraeli obwikalukhasii nende obuleshelwi bwebionoono.

Obufwimbuli 3:20

Lola, esinjiile khumuliango nikhong'onda; omundu yesi naba nahulila omwoyo kwanje, niyeekula omuliango, ndaleenjilamwo, nindia ninaye ebiliibwa, naye ninasi.

OKHWIYAHULA OKHURULA KHUKESHIBALA

Yakobo 4:4

Inywe ababula obwisiikwa, shimumanyile mbu okhuhamba eshialo obwitsa nikhwo okhuhamba Nyasaye obusuku? Kho owenya okhuba omwitsa weshialo, yeekhola ario omusuku waNyasaye.

AbaKolosai 3:2

Rekhwo omwoyo khukali ikulu, ne khukali mushialo ta.

Tito 2:11, 12

Okhuba obukoosia bwaNyasaye bwaloleeshe, nibuleerela abandu bosi obuhonia, nibukhwibaalila, mbu khusile oburaria Nyasaye ta, nende obwikombi bweshialo, nikhumenya mushialo shino eshiliho bulaano mubwitembelesii nobulunjishi nikhumuriitsanga Nyasaye.

Isaya 1:16

Mwiyosie nimwilabia; yinieho mumoni mwanje obubii bwebikhole bieenywe; leshenje okhukhola obubii.

1 Yohana 2:15, 16

Muraheelanga eshialo, kata ebindu ebiamwo tawe. Omundu yesi ouheela eshialo, muye obuheeli bwaSeefwe bubulamwo. Okhuba biosi ebili mushialo, mbu obwikombi bwomubili, nobwikombi bwetsimoni, nokhwichinjimisilia ebia muli ninabio, ebio shibirula ewaSeefwe ta, habula nebieshialo.

Yohana 3:3

Yesu nakalusia, namuboolela ari Toto mwene, ekhusunjila mbu omundu nareebulwa obwibulwi obuyia, shianyala okhulolakhwo obwami bwaNyasaye ta.

1 Petero 1:23

Mweebulwa obwibulwi obuyia; ne shikhuli khumwo eyibola, habula khuyeneyo eyirabola ta, khulwa likhuwa liaNyasaye, eliba mwoyo niliyindila.

Ezekieli 36:26

Ndalamuheelesia omwoyo omuyia, nira mwinywe roho imbia; ndalayinia omwoyo kwelichina okuli munyama yemibili chieenywe, nimuheelesia omwoyo kweinyama.

2 AbaKorinzo 5:17

Okhuba omundu yesi naba nali muKristo, aba omulonje omuyia; amakhuwa kakhale kaba nikamalile okhubira; lole, kosi keekaluule amayia.

1 AbaKorinzo 6:11

Ne abandi khwinywe mwalinji murio; ne inywe mwoosibwa, khandi mwaahulwa, khandi mwabasilibwa obulunjishi muliira liOmwami Yesu Kristo, khandi mu-Roho waNyasaye weefwe.

OKHUFWILILA EBIONOONO --- OKHULAMUSIBWA MUKRISTO

AbaEfeso 2:1 nende 6
Neenywe mwesi mwalinji abafu
khulwa obukhayi bweenywe nende ebionoono bieenywe... Khandi yakhulamusia halala ninaye hashineekulu, muKristo Yesu.

AbaKolosai 3:1

Kho olwa mwaiamusibwa halala nende Kristo, choomenje khukali ikulu, ewa Kristo ali, niyeekhaale khumukhono musaatsa kwaNyasave.

1 Petero 2:24

Ye omwene yeetuukha ebionoono bieefwe mumubilikwe khumusaala; mbu ifwe, nikhufwiliile ebionoono, mana khubeetsenje mwoyo khubulunjishi; ne amakhupacheke niko akachila nimuhonihwa.

AbaGalatia 5:24

Nabo abali baKristo Yesu babambile imela yomubili khumusalaba, halala nobwilaasi nobwikombi bwayo.

AbaRoma 6:2 nende 11
Ifwe abafwa halubeka lwobwonooni, khwakhanyala khurie okhutsiililila okhumenya mubwo?
... Nineenywe mwesi murio mwibasie abeene shinga olwa muli
abafu khubwonooni, habula aba-

lamu khuNyasaye muKristo Yesu.

Yohana 3:36

Ousuubililanga Omwana ali nende obulamu bwobumeli; ne ouramuhulila Omwana ta shialalolakhwo obulamu tawe, ne oburima bwaNyasaye buba khuye.

Yohana 17:3

Nabwo obulamu bwobumeli mbwobuno, mbu bakhumanye iwe ouli Nyasaye watoto wenyene, nende omwenoyo owa waruma, niye Yesu Kristo.

Yohana 3:14, 15

Ne shinga Musa olwa yachinguula inzokha eyo mushitsiimi, nilwo olwa Omwana wOmundu akhoyile okhuchinguulwa ario;

BWOBUMELI

mbu omundu yesi ousuubila abe nobulamu bwobumeli muye.

AbaGalatia 6:8

Shichila ouraaka khulwa omubili kukwe omwene, alachesa obuboli oburula khukomubili; ne ouraaka khulwa Roho, alachesa obulamu bwobumeli oburula khukeshiroho.

Yohana 5:24

Toto mwene, emusunjila mbu ouhulila likhuwa lianje, nasuubilila omwenoyo owaruma, ali nobulamu bwobumeli, ne shiyeenjila mubuyaasibwi ta, nebutswa amalile okhubira okhurula mukhufwa okhwinjila mubulamu.

OBUMANYILISI BWOBUHONIBWI

1 Yohana 4:13

Mwikhuwa lino nimwo omwa khumanyiile shinga olwa khumenyanga muye, naye mwifwe, mbu shichila yakhukabiilekhwo khu-Rohowe.

Yohana 14:21

Ouli ninako amalako kanje nakahulilanga, niye ouheelanga isie; noyo ouheelanga, alaheelwa nende Papa, nasi ndalamuheela nimumanyishila.

1 Yohana 3:18, 19

Baana batii inywe, khuleshenje okhuheelanga namakhuwa kata nolulimi bionyene ta; ne khuheelenje nebikhole nobwatoto. Mwikhuwa lino nimwo omwa khulamanyila shinga olwa khuli abobwatoto, nikhulema omwoyo imbeliwe.

AbaRoma 8:16

Roho omwene arumbulana akobuloli halala nende roho yeefwe shinga olwa khuli abaana ba-Nyasaye.

AbaGalatia 4:6

Khandi olwa muli abaanabe, Nyasaye yaruma Roho wOmwanawe mumioyo chieefwe, nalanjisia ari Aba, Papa.

Isaya 32:17

Ne emilimo chiobulunjishi chilaba omulembe; khandi ebiamo biobulunjishi mbu obuholeelefu nende obwisiichi ebisoni nebisoni.

Yohana 17:13

Ne bulaano enzitsa ewa oli; amakhuwa kano nako engaboola mushialo mbu babe nende okhwikhoya khwanje nikhuusilibwa mubo.

AbaRoma 14:17

Okhuba Obwami bwaNyasaye shibuli khukokhulia nende okhunywa ta, habula nobulunjishi nomulembe nende okhwikhoya, mu-Roho Omutakatifu.

AbaGalatia 2:20

Ndabambwa khumusalaba halala nende Kristo; ne endi mwoyo; khane shishili isie ta, habula Kristo oubeetsanga mwoyo mwisie; nobulamu obwo obwa endi ninabwo mumubili, endi ninabwo mubusuubili obuli muMwana wa-Nyasaye, owa'heela niyeehaana omwene khulwanje.

Yohana 15:11

Amakhuwa kano emuboolcele, mbu okhwikhoya khwanje khube mwinywe, khandi mbu okhwikhoya khweenywe khwitsule.

Itsabuli 16:11

Umanyinjia injila yobulamu; imbeliwo buliho obusangaafu obulamba; mumukhonokwo musaatsa mulimwo amalavi akobumeli.

OKHUULA KHUMUHULILENJE OMWAMI

Okhukalushila Mumalako 11:26-28

Lole, inyanga yino era imbeli weenywe ikhabi nende linyeko; mbu ikhabi, nimuba nimureka amarwi khumalako kOMWAMI Nyasaye weenywe aka emulachilisia inyanga yino; nelinyeko, nimuba nimurareka amarwi khumalako kOMWAMI Nyasaye weenywe ta.

AbaRoma 6:16

Shimumanyile mbu olwa muba nimwihaanile abeene khumundu okhuba abasumbabe abamuhulila, muli abasumba bomwenoyo owa muhulilanga; kata abasumba bobwonooni obuleera okhufwa, kata bobuhulili obuleera obulunjishi?

2 AbaTsesalonika 1:7-9

Nokhumurunga inywe abasandibwa, obusakulushi halala nineefwe, khukhufwimbulwa khwOmwami Yesu okhurula mwikulu halala nabamalaika bobunyalibwe mumemu tsiomulilo; olwa abakhalachila eshiina abeenabo abakhaya okhumumanya Nyasaye ta. kata abakhaya okhuhulila injiili vOmwami weefwe Yesu, Abeenabo balanyoola omukuumo, mbu obwonooneshi bwobumeli, okhwahukhasibwa oburoola imbeli wOmwami khandi imbeli woluyali lwobunyalibwe ta.

34 OKHUULA KHUMWIYAMENJE KRISTO HABULAFU

1 Yohana 2:23

Oyo owambakhana Omwana, shialikhwo nende Samwana ta; ne oumwiyama Omwana, kho ali nende Samwana yesi.

Matsayo 10:32, 33

Kho buli mundu yesi oulandiyama isie imbeli wabandu, nasi ndalamwiyama imbeli waPapa ouli mwikulu. Ne omundu yesi oulandiyambakhana imbeli wabandu, nasi ndalamwiyambakhana imbeli waPapa ouli mwikulu.

AbaRoma 10:9, 10 Okhuba noba norumbula ebulafu nende omunwakwo shinga

Yesu olwa ali ye Omwami, nende okhusuubila mumwoyokwo shingaNyasaye olwa yamulamusia mukhufwa, olahonibwa. Shichila omundu asuubila mumwoyokwe, nabasilibwa obulunjishi; khandi arumbula ebulafu nende omunwakwe, nahonibwa.

Luka 9:26

Shichila omundu yesi oufwimbilwa isie nende amakhuwa kanje omurwe, neniye owa Omwana wOmundu alamufwimbilwa omurwe olwa yeetsa muluyali lulwe omwene nende oluyali lwaSamwana, nende olwabamalaika abatakatifu.

SETANI — OMUSUKU

1 Petero 5:8

Mwiruchenje, nimuba meeso; shichila omusuku weenywe, Setani, achendanga shinga italanyi eyihoola, nakhaaba owa alia.

2 AbaTsesalonika 2:9

Ne okhwitsa khwomwenoyo khuleekhola khulwa obukholi bwaSetani nende ebikhole biobunyali nebilolelo nebiamakana ebirula mububeeyi.

Matsayo 4:1 nende 10, 11 Mana Yesu yeemililwa nende Roho okhutsia mushitsiimi okhuteemwa nende Setani. . Mana Yesu namusunjila mbu Hwaho, Setani; shichila liahandiikwa mbu Omwinamilenje Omwami Nyasa-

yewo, nomukhalabanila ye yenyene. Mana Setani namulekha, ne lola. abamalaika nibeetsa niba-

WEEFWE OMUKALI

mukhalabanila.

Ebikhole 26:18

Okhutimbusia tsimoni tsiabwe, mbu bashiukhane barule khushiilima nibachooma khubulafu, nokhurula khubunyali bwaSetani nibachooma khuNyasaye; mbu baheebwe obuleshelwi bwebionoono nende obulaame mubeenabo abaahulwa khulwa okhusuubilila isie.

AbaEfeso 6:11

Mwifwale ebimanulwa biosi biaNyasaye, mbu munyale okhuyinga obubatsa bwaSetani.

2 AbaTsesalonika 2:8

Mana owobukhavi alifwimbulwa, owatsana owa Omwami Yesu alamalilana khulwa okhufuura khwomuuya okhurula mumunwakwe, namukwisia omukhaya khulwa okhulolekhakhwe olwa aleetsa.

AbaHeburania 2:14

Kho shinga abaana olwa basanjilana khumabanga neinyama yomubili, ye yesi yasanjilana ario khubiatsana; mbu mana munjila vokhufwa atibie ovo owali nali nende obunyali bwokhufwa, niye Setani.

1 Yohana 3:8

Oukholanga akobwonooni nowaSetani: okhuba Setani voonoonanga okhurula khukhuchaaka. Ne niko akachila Omwana wa-Nyasaye yabakalwa ebulafu, mbu ahesie emilimo chiaSetani.

AbaRoma 8:35 nende 37

Niwina ounvala okhukhukabukhasia nende obuheeli bwaKristo? amatinyu noho, kata amasila, kata obusandibwi, kata eshimotso, kata eshihechenye, kata akamaraba, kata olukanga? . . . Nebutswa mu ako kosi khuli abahuli muno khulwa omwenoyo owakhuheela.

OBUHEELI NIBWO OBUMANYINJIA KHULI ABEECHI BAYESU

AbaGalatia 5:22, 23

Ne ebiamo biaRoho mbiebino; mbu obuheeli, obusangaafu, omulembe, obwifwili, eshisa, obulayi, obwisiikwa, obuholo, obwiruchi.

1 Yohana 4:20

Omundu naba naboola ari Emuheelanga Nyasaye, ne nakiya omwana wabwe, nomubeeyi; shichila ouraheela omwana wabwe, owa alolanga, shikakhanyalikha mbu amuheela Nyasaye owa aralolakhwo tawe.

Yohana 21:16

Namusunjila khandi olwakhabili, ari Simoni waYohana, u'heelanga noho? Naye namusunjila ari Ee, Omwami; omanyile shinga olwa endi omwitsawo. Namuboolela ari Yaya amakondi kanje.

1 AbaKorinzo 13:1

Kata nimba nimboolela mutsinimi tsiabandu netsiabamalaika, ne nimbula obuheeli, endi butswa shinga omukasa okulanjilila, kata ebisili ebisaala.

1 Yohana 3:14

Khumanyile shinga olwa khwarula mukhufwa nikhwinjila mubulamu, shichila khuheelanga abalangwa mbu abaana beefwe. Ouraheelanga ta amenyanga mukhufwa.

OKHULAMUSIBWA

AbaRoma 4:25

Omwenoyo owakhobwa khulwa obukhavi bweefwe, nalamusibwa mbu khubasilibwekhwo obuluniishi.

Ebikhole 10:39-41

Ne ifwe khuli abaloli bamakhuwa kosi aka yakhola, kata mushialo shiahaYahudi kata muYerusalemu; ne bamala nibamwira. nibamufunga khumusaala. Nomwenoyo, Nyasaye yamulamusia mukhufwa khunyanga yakhataru, namunyalila okhulolosibwa ebulafu; ne khubandu bosi ta, habula khubaloli aba Nyasaye yalobola khale, nifwe abalia ninaye olwa vali namalile okhulamukha okhurula mukhufwa.

Yohana 20:26-28

Ne olunvuma lwetsindaalo munaane, abeechibe bali nibali mubwenomwo khandi, nibali nende Tomasi halala. Yesu niveetsa. emiliango nichiikaale, nasinjila hakari, nabasunjila ari Omulembe kube khwinywe. Mana namusuniila Tomasi ari Leera olwalalwo hano, olole amakhono kanje; khandi leera omukhonokwo, okure mumbafu tsianje; noraba omundu ourasuubila ta, habula owobusuubili. Tomasi nakalusia namusunjila mbu Omwami wanje, khandi Nyasaye wanje.

OKHULAMUSIBWA NIKHWO OBUNAAYI BWEEFWE OBWOLUYALI

Matsayo 16:21

Okhurula khushise eshio Yesu yachaaka okhumanyia abeechibe shinga olwa akhoyile okhutsia eYerusalemu, nokhwifwila amakhuwa amanji khubakofu nabakuhani abakhulundu nabahandiichi, nokhwirwa, nokhulamusibwa khunyanga yakhataru.

AbaRoma 6:3-5

Nohomba mushili okhumanya mbu ifwe fwesi ababatisibwa nikwinjisibwa muKristo Yesu kwabatisibwa nikhwinjisibwa mukhufwakhwe? Khulwako khwayabilwa ninaye halala nikhwinjisibwa mukhufwa khulwa obubatisibwi; mbu mana shinga Kristo olwa yalamusibwa okhurula mukhufwa khulwa oluyali lwaSeefwe, neefu fwesi khurio khuchende mubulamu obuyia. Shichila nikhuba nikhwaliimaasibwa ninaye khulwa okhufwa khulala nende okhukhwe, khuliba khurio khandi kulwa okhulamusibwa khulala nende okhukhwe.

AbaRoma 1:4

Ne halubeka lweimela yaroho yobutakatifu, yarumbulwa ebulafu nobunyali shinga olwa ali Omwana waNyasaye, khulwa okhulamusibwa khwabafu; niye Yesu Kristo Omwami weefwe. Luka 1:74, 75

Okufuchiilila mbu ifwe, olwa khumalile okhuhonibwa mumakhono kabasuku beefwe, mana khumukhalabanilenje aharali oburii bwosi ta mubutakatifu rende obulunjishi imbeliwe tsindaalo tsieefwe tsiosi.

2 AbaKorinzo 7:1

Kho abaheelwa banje, olwa khwasuubisibwa amakhuwa ako, khwisiiye abeene mushifwabwi shiosi shiomubili nende eshiaroho, nikhuusilia elala obutakatifu mukhuria Nyasaye.

2 Timotseo 2:21

Kho omundu naba niyeesiiya khukano, aba eshimanulwa eshiheebwa oluyali, eshiahule, eshikhoyeele okhwikhoonyelwa nomwami, eshikasilibwa buli mulimo omulayi.

1 Petero 1:2

Abalobolwa obumanyi bwa-Nyasaye ouli Samwana shinga olwa buli, owamanya khale akali imbeli, mubwahule bwaRoho, okhuula khubuhulili nende khubumiitswi bwamatsayi kaYesu Kristo; obukoosia nomulembe bimeeteshenje khwinywe.

1 Petero 1:15

Ne shinga ye owamulanga olwa ali omutakatifu, neenywe mwesi murio mube abatakatifu munjenda yeenywe yosi.

OBUTAKATIFU IMBELI WOMWAMI

Matsayo 3:11

Isie toto emubatisinjia nende amatsi khulwa obwikalukhasii; ne owitsanga munyuma wanje ya'shila amaani; shingwanile kata okhumuchinjila ebilaarobie ta; omwenoyo alamubatisia nende Roho Omutakatifu nende omulilo.

Isava 35:8

Omuhanda kulabayo, nakwo kulalangwa mbu Injila yObutakatifu; abeshifwabwi shibalabirakhwo tawe; abachendi, kata nibali abasilu, shibalakorakhwo ta.

AbaHeburania 13:12

Ne niko akachila Yesu naye yasaalilila elwanyi weshilibwa, mbu yaahule abandu khulwa amabangake.

AbaEfeso 4:24

Nimwifwala imela eyo imbia eyalongwa mukhufwana khwa-Nyasaye mubulunjishi nobutakatifu obwatoto.

1 Yohana 1:9

Ne nikhuba nikhwiyama ebionoono bieefwe, ye nomwisiikwa khandi omulunjishi okhukhuleshela ebionoono bieefwe, nokhukhusiiya khububii bwosi.

AbaEfeso 1:4

Shinga olwa yakhulobola muye okhurula khumusuule, mbu khube abatakatifu, ababula eshikha shiosi imbeliwe, mubuheeli.

42 ABANDU ABEETSULA ROHO OMUTAKATIFU

AbaRoma 8:9

Nebutswa inywe shimuli mumela yomubili ta, habula muli mumela yaroho, Roho waNyasaye naba namenyanga mwinywe. Ne omundu yesi ouralikhwo nende Roho waKristo ta, oyo shialikhwo owuwe tawe.

Luka 11:13

Kho inywe abali ababii olwa mumanyile okhubaheelesia abaana beenywe ebihaanwa ebilayi, Seenywe owomwikulu shialashila muno okhubaheelesia Roho Omutakatifu abo abamusaba?

Ezekieli 36:27

Ndalara roho wanje mukari mwinywe, nimuchesia mumalako kanje; mulalindanga akobukhalachi bwanje nimukakhola.

Ebikhole 13:52

Abeechi nabo nibeetsulamwo okhwikhoya khandi nende Roho Omutakatifu.

Ebikhole 1:8

Ne mulanyoola amaani olwa Roho Omutakatifu alaba namwitsiile; ne mulaba abarumbusi banie.

Ebikhole 4:31

Ne olwa bali nibamalile okhusaba, munzu omwa bali nibakhung'aanilemwo nimutechela; nabobosi nibeetsulamwo Roho Omutakatifu, nibarumbula likhuwa liaNyasaye nende itswoni.

AMASUUBISIO AMALAYI KHUBAKRISITAYO

Isaya 66:2

Shichila ebindu biosi omukhono kwanje nikwo okwabikhola, khandi bino biosi nebianje; nolwa OMWAMI aboola. Ne omundu uno niye owa ndalahenganga, mbu omwituutuyi, owomwoyo okwinyushile, outechelelanga likhuwa lianje.

Obufwimbuli 21:4

Aleeya amasika kosi mumoni tsiabwe; kata okhufwa shikhulabaho khandi ta; kata shikhulabaho okhwikhuula, kata okhulila, kata okhusaalila khandi tawe; ako akaranjilila kahweele.

Itsabuli 34:18

OMWAMI abeetsanga ahambi khubeenabo aba emioyo chiabwe chitubuushe, nabahonia aba tsiroho tsiabwe tsiinyushile.

1 Petero 4:12, 13

Abaheelwa banje, murahuka khukokhuteemwa khweenywe khwomulilo, okhumukwila mbu khumuchele, shinga olwa kali amakhuwa amacheni akamwikholakhwo, ta. Ne aha musanjilanilanga khukhusaalila khwaKristo, mwikhoye; mbu khukhufwimbulwa khwoluyalilwe nakhwo muliikhoya omwikhoyo omukali.

44 AMASUUBISIO KHUBO ABATEEMUNGWA

Itsabuli 34:19

Amabii aka omulunjishi akholelungwa namanji, ne OMWAMI amureesinjia mukosi.

Isava 43:2

Olwa obira mumatsi, embeetsangaho ninawe; kata mumialo, ne shichilakhuyombeelela tawe; olwa ochenda mumulilo, shiolafulukha ta; kata tsimemu shitsilakhusamba ta.

AbaRoma 8:28

Khandi khumanyile mbu mumakhuwa kosi Nyasaye akholelanga halala nende abo abamuheela okhuleera amalayi, nibo abeenabo abalangwa khulwa tsiyemitsie shinga olwa tsili.

1 AbaKorinzo 10:13

Mushili okhuteemwa nende likhuwa liosi ta, habula aka omundu anyala. Nyasaye nomwisiikwa, ne shialafuchiilila mbu muteemwe okhushila ako aka mulanyala tawe; habula halala nende okhuteemwa khwene, alamukasilia injila eyokhwihonokoshelakhwo, mbu mana munyale okhwifwila.

AbaHeburania 2:18

Shichila olwa omwene yasaalila mubuteemwi, anyala okhubahabina abateemungwa.

AMASUUBISIO KHUBAHULI

Obufwimbuli 3:21

Oyo ouhula, ndalamufuchiilila okhwikhala ninasi khushifumbi shianje shioburuchi, shinga isie siesi olwa ndahula, ninzikhala nende Papa khushifumbishie shioburuchi.

Obufwimbuli 3:12

Oyo ouhula, ndalamukhola abe isiilo muhekalu yaNyasaye wanje, ne shialarulamwo khandi ta. Ndalahandiika khuye eliira liaNyasaye wanje, nende eliira lielitookho liaNyasaye wanje, nilio Yerusalemu liyia, elirula mwikulu, okhurula ewaNyasaye wanje, khandi nende eliira lianje omwene liyia.

Obufwimbuli 21:7

Oyo ouhula alalaamilwa bino; nasi ndalaba Nyasayewe, naye alaba omwana wanje.

Obufwimbuli 2:7

Ouli namarwi, ahulile aka Roho asunjila tsikanisa. Oyo ouhula, ndalamufuchiilila okhulia khumusaala kwobulamu, okuliho mumukunda kwaNyasaye.

Obufwimbuli 3:5

Oyo ouhula alafwalwa ario ebiifwalo ebilafu; kata shindalasiliisia eliiralie lirule mushitabu shiobulamu nahatuutu ta; ne ndaleeyama eliiralie imbeli waPapa, khandi imbeli wabamalaikabe.

46 NYASAYE ABOOLANGA KHUKOBUKABUKHANI

AbaRoma 7:2, 3

Okhuba omukhasi owateeshibwa abeetsanga wabohwa nende itorati khumusaatsawe olwa aba nashili mwovo: ne omusaatsawe naba nafwa, ulekhuulilwe khukeitorati akali khumusaatsa. Nebutswa naba natsia khuwundi, olwa omusaatsawe ashili mwoyo, alalangwa mbu omuheyi; ne omusaatsawe naba nafwa, aba omulekhuule khutorati; mana kata naba natsia khumusaatsa undi, shiaba omuheyi ta.

1 AbaKorinzo 7:10, 11, 39

Ne khubateeshania embalachilisia, kata shindi isie ta, habula Omwami, mbu omukhasi ararula

khumusaatsawe ta. Nebutswa naba namurulakhwo, amenye ario narateeshibungwa ta, nohomba mbu asaasanibwe nomusaatsawe. Omusaatsa nave aramwilusia omukhasiwe tawe. . . Omukhasi abeetsanga omubohe olwa omusaatsawe ashiliho mwoyo, ne omusaatsawe olwa aba namalile okhufwa, nomulekhuule ounyala okhuteeshibwa nende omundu owa omwene achama; habula mbu khukholelwe muMwami.

Luka 16:18

Buli mundu owilusia omukhasiwe nateeshia oundi, aheya; noyo outeeshia omukhasi ouba niyeelusiibwe nomusaatsawe yesi aheya.

OKHWITSA KHWAKRISTO OKHWAKHABILI

Yakobo 5:8

Neenyu mwesi mwisimilisie murio; mwitinyie emioyo chieenywe; shichila okhwitsa khwOmwami khuli ahambi.

Matsavo 24:27

Shichila shinga oluhenu olwa lurulanga ebukwe, nilulolekha kata okhuula mumbo, nolwa okhwitsa khwOmwana wOmundu khuliba.

Matsavo 24:30

Mana eshilolelo shililolekha eshiOmwana wOmundu mwikulu; mana tsimbia tsiosi tsiabomushialo tsiliikhuula, ne balilola Omwana wOmundu niyeetsa mumaleesi akomwikulu nende obunyali noluyali olunji.

Mariko 8:38

Shichila omundu yesi oufwimbilwa isie nende amakhuwa kanje omurwe, mulwibulo luno olwobwonooni, olubula obwisiikwa, khandi Omwana wOmundu alamufwimbilwa ye omurwe olwa yeetsa muluyali lwaSamwana halala nende abamalaika abatakatifu.

Yohana 14:3

Ne nimba ninzia nimukasilia habundu, ndaleetsa khandi nimwinjisia ewanje, mbu ewa endi isie, nineenywe mwesi mubeho.

Luka 12:40

Nineenywe mwesi murio, mwirecheshe: shichila khusaa eya murapaarakhwo ta, Omwana wOmundu veetsa okhwitsa.

1 Yohana 3:2

Abaheelwa banje, bulaano khuli abaana baNyasaye, ne khushili okhufwimbulilwa shinga olwa khuliba. Khumanyile mbu ye olwa aliba nafwimbuulwe, khulifwanana ninaye; shichila khulimulola shinga olwa ali.

Obufwimbuli 16:15

Ari, Lola, enzitsa shinga omwibi. Noweibaraka oyo oubeetsanga meeso, natong'a nende tsingubotsie, aleshe okhuchenda eshihechenye, nafwimbwa omurwe imbeli wabandu.

Ebikhole 1:11

Nabo nibasunga mbu Inywe abandu beGalilaya, olwashiina nimusiniiile nimuhenga mwikulu? Yesu uno owamurusiibwekhwo nakulusibwa nayilwa mwikulu aleetsa ario shinga olwa mumuluutsi natsia mwikulu.

Matsayo 16:27

Shichila Omwana wOmundu aliitsa muluyali lwaSamwana halala nende abamalaikabe; nahabwenaho alamukalusilia buli mundu ebikholebie shinga olwa bili.

LIKHUWA LIANYASAYE

Itsabuli 119:11

Embiisbile likhuwalio mumwoyo kwanje mbu endeshe okhukhwonoonela.

Matsayo 22:29

Ne Yesu nakalusia, nabasunjila mbu Mushiamile, nimuramanya amahandiiko, kata obunyali bwa-Nyasaye shinga olwa buli ta.

Luka 21:33

Likulu nende eshibala bilihwaho; ne amasungo kanje shikalihwaho ta.

2 Timotseo 3:16

Buli lihandiiko elia Nyasaye yaheelamwo omuuyakwe likaasilanga obwechesii, nobukondesheli, nobukololosii, nobwibaali obuchooma khubulunjishi

Itsabuli 119:89

E OMWAMI, likhuwalio neliobumeli; liraliile mwikulu.

2 Petero 1:21

Okhuba bubulaho obulakusi bwosi obweetsa khulwa okhwenya khwomundu ta; habula abandu baboola akarula khuNyasaye, shinga olwa beemililwa nende Roho Omutakatifu.

Itsabuli 119:105

Likhuwalio neitaha khubilenje bianje, khandi nobulafu khunjila yanje. Scripture text reprinted from the New Testament in Luyia by permission of United Bible Societies Africa Regional Centre, Nairobi, Kenya. Used by permission.

Published in numerous languages by World Missionary Press as God supplies funds in answer to prayer. If you would like more copies for careful distribution, please write to us in English.

World Missionary Press, Inc. P.O. Box 120 New Paris. IN 46553-0120 USA